

В ПЯТОК ВТОРЫЯ СЕДМИЦЫ ПО ПАСЦЕ ВЕЧЕРА,

Обычная кафисма. На Господи возвах: стихиры самогласны, глас 1-й:

Аверем заключенным, учеником собранным, вшел еси внезапно всесильне Иисусе Боже наш: и став посреде их, мир дав, исполнил еси Святаго Духа: ждати же повелел еси, и никакоже разлучатися от Иерусалима, дондеже облекутся еже с высоты силою. Темже вопием Ти: просвещение, и Воскресение и мире наш, слава Тебе.

По днех осмих востания Твоего Господи, явился еси учеником Твоим на месте, идеже бяху собрани, и возгласив им: мир вам, неверующему ученику руке показал еси, и пречистое ребро. Он же веровав вопияше Тебе: Господь мой и Бог мой, слава Тебе.

Фома, глаголемый Ближец, не бе с ними, егда вшел еси, Христе, заключенным дверем: темже и не вероваше реченным ему, от неверия в веру известуя. Не несподобил же еси Блаже, показати ему пречистое ребро Твое, и руку и ногу язвы: он же осязав и виде, исповеда Тебе быти Бога не нага, и Человека не проста, и вопияше: Господь мой и Бог мой, слава Тебе.

Таже Минен, 3. Слава: глас 6-й:

Аверем заключенным, пришел еси Христе ко учеником, тогда Фома смотрительно не обретеса с ними. Глаголаше бо: не иму веры, аще не увижду и аз Владыки. Увижду ребро, отонудуже изыде кровь, вода, крещение. Увижду язву, от неяже исцеле великий струп человеческий. Увижду, како не бе, якоже дух, но плоть и кости. Смерть поправый, и Фому уверивый, Господи слава Тебе.

И ныне: Богородичен, глас 1-й:

Всемирную славу от человек прозябшую, и Владыку рождшую, небесную дверь воспоим Марию Деву, безплотных песнь и верных удобрение. Сия бо явися небо, и храм Божества: сия преграждение вражды разрушивши, мир введе, и царствие отверзе. Сию убо имущу веры утверждение, поборника имамы из Нея рождающаго Господа. Дерзайте убо, дерзайте людие Божии, ибо Той победит враги яко Всесилен.

Свете тихий: Прокимен дне.

На стиховне стихиры воскресныя, глас 1-й:

Вечерняя наша молитвы, прими Святый Господи, и подаждь нам оставление грехов, яко един еси явлей в мире Воскресение.

Стих: Господь воцарися, * в лепоту облечеса.

Обыдите людие Сион, и обымите его, и дадите славу в нем, Воскресшему из мертвых: яко Той есть Бог наш, избавлей нас от беззаконий наших.

Стих: Ибо утверди вселенную, * яже не подвижится.

Приидите людие воспоим, и поклонимся Христу, славяще Его из мертвых Воскресение, яко Той есть Бог наш, от прелести вражия мир избавлей.

Стих: Дому Твоему подобает святыня Господи, * в долготу дний.

Страстию Твоею Христе, от страстей свободихомся, и Воскресением Твоим из истления избавихомся, Господи слава Тебе.

Слава, и ныне: глас 5-й:

Человеколюбче, велие и безприкладное множество щедрот Твоих: яко долготерпел еси, от иудей заушаемъ, от апостола осяжаемъ, и от отмечающихся Тебе многоиспытуемъ, како воплотился еси? како распялся еси безгрешне? но вразуми нас яко Фому вопити Тебе: Господь мой и Бог мой, слава Тебе.

Таже: **Н**ыне отпускаеши:

По Трисвятом, тропарь праздника. Аще ли тропарь святого, рцы его прежде. Потом:

Слава, и ныне: Тропарь праздника, глас 7-й

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

Ектения, и отпуст.

Известно же буди, яко каноны о усопших Октоиха настоящего гласа, по вся субботы в Пятдесятнице должны суть петься, в пятках вечера, на Повечериях.

В СУББОТУ 2-я СЕДМИЦЫ ПО ПАСЦЕ НА УТРЕНИ

На Бог Господь, тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. **[Трижды].**

По 1-м стихословии седален, глас 1-й:

Гроб Твой Спасе воины стрегущии, мертви от облистания являшагося ангела быша, проповедающего женам Воскресение. Тебе славим тли потребителя, Тебе припадаем воскресшему из гроба, и единому Богу нашему.

Глас тойже.

Подобен: Камени запечатану:

Жены ко гробу приидоша ураншия, и ангельское явление видевшия трепетаху: гроб облиста жизнь, чудо удивляше я. Сего ради шедшия учеником проповедаху востание: ада плени Христос, яко един крепок и силен, и истлевшия совоздвиже вся, осуждения страх разрушив силою Креста.

Слава, и ныне: Богородичен:

Гавриилу вещавшу Тебе Дево, радуйся, со гласом воплощавшеся всех Владыка в Тебе святем кивоте, якоже рече праведный Давид: явилася еси ширшая небес, поносивши Зиждителя Твоего. Слава всельшемуся в Тя, слава прошедшему из Тебе, слава свободившему нас Рождеством Твоим.

По 2-м стихословии седален, глас 1-й:

Подобен: Камени запечатану:

Страха ради иудейска, сокроуенным учеником, и в Сионе собранным, вшел еси к ним Блаже, и стал еси посреде их, дверем заключенным, радостотворяй: и показал еси им руже, и пречистых Твоих ребр язвы, глаголя неверующему ученику: принеси руку твою и испытай, яко Сам Аз есмь, тебе ради пострадавый.

И чтение. Таже: Воскресение Христово видевше: псалом 50.

Канон праздника, со ирмосы, на 6: и святого, егоже есть храм, на 4: и Миней, на 4. По 3-й песни кондак, и седален Миней. Слава и ныне: праздника. По 6-й песни кондак празднику, и икос. По 9-й песни ексапостиларий празднику.

Песнь 1.

Ирмос: Поим вси людие, от горкия работы фараони Израиля Изменшему, и во глубине морстей ногами немокрыми Наставльшему, песнь победную: яко прославися.

Днесь весна душам, зане Христос от гроба якоже солнце возсияв тридневный, мрачную бурю отгна греха нашего. Того воспоим, яко прославися.

Царица дней, светоносному дню, дней же царю явственнейши даронося, красит избранныя люди церковныя, непрестанно поя воскресшаго Христа.

Врата смерти Христе, ниже гробныя печати, ниже ключи дверей Тебе противишася: но воскрес предстал еси другом Твоим Владыко, мир даруяй, всяк ум преимуш.

И святого Миней на 4.

Катавасия: Воскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведе, * победную поюция.

Песнь 3.

Ирмос: Утверди мене Христе, на недвижимом камени заповедей Твоих, и просвети мя светом лица Твоего: несть бо свят паче Тебе Человеколюбче.

Новыя вместо ветхих, вместо же тленных нетленная, Крестом Твоим Христе совершив нас, во обновлении жизни жительствововати достойно повелел еси.

Во гробе заключен описанною плотию Твоею, неописанный Христе воскрес еси: дверем же заключенным, предстал еси Твоим учеником Всесильне.

Язвы Твоя Христе, яже волею претерпел еси за нас, учеником Твоим сохранив, свидетельство показал еси Твоего славнаго Воскресения.

И святаго Минея на 4.

Катавасия: Приидите, пиво пием новое, * не от камене неплодна чудеемое, * но нетления источник, * из гроба одождивша Христа, * в Немже утверждаемся.

И кондак, и седален святаго.

Слава, и ныне: седален празднику, глас 6-й:

Яко посреде учеников Твоих пришел еси Спасе, мир дая им: прииди и к нам и спаси нас.

Песнь 4.

Ирмос: Велия тайна Твоего Христе, смотраения: сию бо свыше провидя, богозрительно Аввакум, изшел еси, вопияше Тебе, во спасение людей Твоих Человеколюбче.

Желчи убо вкуси, древнее вкушение исцеляя, ныне же с сотом меда, просвещение подая Христос праотцу, и Свое сладкое Причастие.

Радуешися испытаямъ: темже Человеколюбче, на сие повелеваеши Фоме, простирая неверующему ребра, мірови уверяя Твое Христе, тридневное Востание.

Богатство почерп от сокровища некрадомаго Божественнаго, Благодетелю, копием прободеннаго Твоего ребра, премудрости и разума наполняет мір близнец.

Твой всеблаженный хвалится язык, о близнче! Первый бо благочестно проповедует Жизнодавца Иисуса, Бога же и Господа, от осязания исполнься благодати.

И святаго Минея на 4.

Катавасия: На Божественней стражи * богоглаголивый Аввакум * да станет с нами и покажет * светоносна Ангела, * ясно глаголюща: * днесь спасение миру, * яко воскрес Христос, * яко Всесилен.

Песнь 5.

Ирмос: От нощи утренююще поем Тя, Христе, Отцу Собезначальна, и Спаса душ наших: мир мірови подаждь, Человеколюбче.

Представ другом скорбящим Спас, пришествием всю отъемлет скорбь, и играти воздвизает Своим Воскресением.

О воистинну похваляемого Фома страшного начинания! Дерзостно бо осяза ребра, Божественным огнем блистающая.

Неверие Фомино, веры родительное нам показал еси: Ты бо вся премудрости Твоею промышляеши полезно Христе, яко Человеколюбец.

И святого Минея на 4.

Катавасия: Утренюем утреннюю глубоку * и вместо мира песнь принесем Владыце, * и Христа узрим правды Солнце, * всем жизнь возсияющая.

Песнь 6.

Ирмос: Пророка спасл еси от кита Человеколюбце, и мене из глубины предгрешений возведи, молюся.

Фома не оставил еси Владыко, погружаема глубинное неверия, длани протер на испытание.

Спас наш глаголаше: осязавше мя видите кости и плоть носяща, Аз не пременихся.

Ребра осяза, и веровав позна Фома, не сый в первом входе Твоем, Спасе наш.

И святого Минея на 4.

Катавасия: Снизшел еси в преисподняя земли * и сокрушил еси верей вечных, * содержащая связанные, Христе, * и тридневен, яко от кита Иона, * воскресл еси от гроба.

Кондак, глас 8-й:

Любопытною десницею, жизнеподательная Твоя ребра Фома испыта Христе Боже: созаклоченным бо дверем яко вошел еси, с прочими апостолы вопияше Тебе: Господь еси и Бог мой.

Икос: Кто сохрани ученичу длань тогда неопалиму, егда ко огненным ребром приступи Господним? Кто даде ей дерзость, и возможе осязати пламенную кость, всяко неосязимую? Аще бо не бы ребро силу подало брenneй деснице, како можаше осязати, страданьми поколебавшая яже выше, и яже низу? Сия благодать Фоме дадеся, еже сия осязати, Христови же вопити: Господь еси и Бог мой.

Песнь 7.

Ирмос: Образу служити мусикийскому согласию созывающу люди, от песней Сионских поюще отечески отроцы Давидовы, мучителево разориша злочестивое веление, и пламень в росу преложиша, песнь воспевающе: превозносимый отцев и наш Боже, благословен еси.

Яко первый есть дней и Господьственный светоносный сий, воньже радоватися достойно новым и божественным людем с трепетом: приносит бо и века образ, яко осмица совершая будущего, превозносимый отцев и наш Боже, благословен еси.

Един дерзнувший, неверною же верою облагодетельствовавший нас Фома близнец, решит убо мрачное неведение всех концов, верным неверствием, себе же венец плетет яве глаголя: Ты еси Господь, превозносимый отцев и наш Боже, благословен еси.

Не все усумневся Фома о востании Твоем, не низложися: но несумнительное тщашеся показать сие Христе, всем языком. Отонудуже неверием уверив, всех научи глаголати: Ты еси Господь превозносимый отцев и наш Боже, благословен еси.

Со страхом руку Фома в ребра Твоя живоносная, Христе, вложив, трепетен ощути действо, Спасе, сугубое, двема естествома в Тебе соединяемым неслиянно, и верую вызываше глаголя: Ты еси Господь превозносимый отцев и наш Боже, благословен еси.

И святого Минея на 4.

Катавасия: **Отроки** от печи избавивый, * **быв Человек**, * **страждет яко смертен**, * **и страстию смертное** * **в нетления облачит благолепие**, * **Един благословен** * **отцев Бог и препрославлен**.

Песнь 8.

Ирмос: **В** пламени огненне горящая печи Сохраншаго дети, и во зраце ангела Снизшедшаго к ним, пойте Господа, и превозносите Его во веки.

Возжелевый Твое радостное видение, прежде не вероваше Фома: сподоблься же того, Бога и Господа Тя нарицаше Владыко, Егоже превозносим во вся веки.

Претерпевшаго Фомино неверие, и показавшаго ребра, и того дланию осызана бывша, пойте Господа, и превозносите Его во веки.

Твое неудобное сокровище, утаенное нам отверзе Фома: богословив бо языком богоносным, пойте Господа, глаголаше, и превозносите Его во вся веки.

И святого Минея на 4.

Катавасия: **Сей** нареченный и святыи день, * **Един суббот Царь и Господь**, * **праздников праздник** * **и торжество есть торжеств**: * **воньже благословим Христа во веки**.

И стихословим Честнейшую

Песнь 9.

Ирмос: **Тебе** светлую свещу, и Матерь Божию, пречудную Славу и высшую всех тварей, песньми величаем.

Твой светлый день и пресветлый Христе, все светлую благодать, воньже красный добротой учеником Твоим предстал еси, в песнях величаем.

Тебе брэнною дланию осызаема в ребра, и не опаливши сию, огнем невестественнаго Божественнаго существа, в песнях величаем.

Тя яко Бога из гроба воскресша Христа, не очима видевшие, но сердечною любовию веровавшие, песньми величаем.

И святого Минея на 4.

Катавасия: **Светися, светися, новый Иерусалиме:** слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Екзапостилларий, глас 3-й:

Подобен: Небо звездами:

Моих удов рукою твоею испытывай язвы, не неверуй Ми Фома, уязвленному тебе ради, со ученики единомудрствуй, и живущаго проведуй Бога. [Дважды]

Слава: святого, аще есть и ныне:

Днесь весна благоухает, и новая творь ликует. Днесь взимаются ключи дверей, и неверия Фомы друга вопиющая: Господь и Бог мой.

На хвалитех стихиры воскресны, на 4, глас 1-й:

Поем Твою Христе спасительную страсть, и славим Твое Воскресение.

Крест претерпевый, и смерть упразднивый, и воскресый из мертвых, умири нашу жизнь Господи, яко един всемогущ.

Ада пленивый, и человека воскресивый Воскресением Твоим Христе, сподоби ны чистым сердцем Тебе пети и славить.

Боголепное Твое снисхождение славяще, поем Тя Христе: родился еси от Девы, и неразлучен был еси от Отца: пострадал еси яко Человек, и волею претерпел еси Крест. Воскресл еси от гроба, яко от чертога произшед, да спасеши мир: Господи слава Тебе.

Слава, и ныне: глас 6-й:

По днех осмех востания Твоего Иисусе Царю, единородный Слово Отчий, явился еси учеником Твоим, заключенным дверем, мир Твой подавая, и неверующему ученику знамения показал еси: прииди и осяжи руце и нозе, и нетленная Моя ребра. Он же веровав, вопияше Тебе: Господь мой и Бог мой, слава Тебе.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры празднику, глас 1-й:

Подобен: Прехвальнии мученицы:

По еже из гроба Твоем страшном Жизнодавче востании, якоже печатей не разрушил еси Христе гробных, тако заключенным дверем, вшел еси к преславным апостолом Твоим, радостотворя им, и Правый Твой Дух подавая им, за безмерную Твою милость.

Стих: Во всю землю изыде вещание их, и в концы вселенныя глаголы их.

Фома иже и Близнец не бе пришел, егда Ты учеником явился еси Господи: темже не верова Твоему Воскресению, и видевшим Тя вопияше: аще не вложу перста в ребра Его и гвоздей язвы, не верую, яко востал еси.

Стих: Небеса поведают славу Божию, творение же руку Его возвещает твердь.

Якоже хочещи осяжи, Христос Фоме вопияше, вложи руку, и познай Мя кости имуща, и земное тело, и не буди неверен, равно же со иными уверися. Он же возопи: Бог мой и Господь Ты еси, слава востанию Твоему.

Слава, и ныне: глас тойже:

Учеником сомнящимся, во осмый день предста Спас, идеже бяху собрани, и мир дав, Фоме возопи: прииди апостоле, осяжи длани, в нихже гвоздия вонзоша. О доброе неверие Фомино, верных сердца в познание приведе! И со страхом возопи: Господь мой и Бог мой, слава Тебе.

Таже, **Благо** есть исповедатися **Господеви**

Трисвятое. И по Отче наш:

Тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

Таже **ектения: Помилуй нас Боже:**

Час 1. И отпуст.

НА ЛИТУРГИИ

Изобразительная, и от канона праздника, песнь 9, на 6.

Твой светлый день и пресветлый Христе, всесветлую благодать, воньже красный добротой учеником Твоим предстал еси, в песнях величаем. [Дважды]

Тебе брэнною дланию осязаема в ребра, и не опаливши сию, огнем невестественнаго Божественнаго существа, в песнях величаем. [Дважды]

Тя яко Бога из гроба воскресша Христа, не очима видевши, но сердечною любовию веровавши, песньми величаем. [Дважды]

По входе тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. [трижды].

И храма Богородицы, и храма святого. Посем настоящего святого, аще есть. Также кондак храма святого. Слава: святого:

И ныне: праздника: Кондак, глас 8-й:

Любопытною десницею, жизнеподательная Твоя ребра Фома испыта Христе Боже: созаключенным бо дверем яко вшел еси, с прочими апостолы вопияше Тебе: Господь еси и Бог мой.

Храма же Христова, и Богородицы кондак, во всю Пятдесятницу не глаголем.

Прокимен Апостола, глас 3-й: Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 15. [Деян. 5, 21 – 33.]

Слышавше апостолы внидоша по утренице {утро} в церковь и учашу. Пришед же архиерей и иже с ним, созваша собор и вся старцы от сынов Израилевых и послаша во узилище, привести их. Слути же шедше не обретоша их в темнице, возвращшежеся возвестиша, Глаголюще, яко темницу убо обретохом заключену со всяким утверждением и блюстителю стоящим пред дверьми: отверзше же, внутрь ни единого обретохом. Якоже слышаша словеса сия архиерей же и воевода церковный и первосвященники, недоумевашуся о них, что убо будет сие. Пришед же некто возвести им, глаголя, яко се, мужие, ихже всадише в темницу, суть в церкви стояще и учаще люди. Тогда шед воевода со слугами, приведе их не с нуждею, бояхуся бо людей, да не камением побьют их: Приведше же их, поставиша на сонмищи, и вопроси их архиерей, глаголя: Не запрещением ли запретихом вам не учить о имени сем? и се, исполните Иерусалим учением вашим и хотите навести на ны кровь Человека Сего. Отвещав же Петр и апостолы реша: повиноватися подобает Богови паче, нежели человеку: Бог отец наших воздвиже Иисуса, Егоже вы убили, повесивше на древе: Сего Бог Началника и Спаса возвыси десницею Своею, дати покаяние Израилеви и оставление грехов: И мы есмы Того свидетели глагол сих, и Дух Святой, Егоже даде Бог повинующимся Ему. Они же слышавше распыхашуся и совещаща убить их.

Аллилуиа, глас 8-й: Приидите возрадуемся Господеви, воскликнем Богу Спасителю нашему.

Стих: Яко Бог велий Господь, и Царь велий по всей земли.

Евангелие Иоанна, зачало 19. [Ин. 6, 14 – 27.]

Видевше человецы знамение, еже сотвори Иисус, глаголаху, яко Сей есть воистинну Пророк грядый в мир. Иисус убо разумев, яко хотят приити, да восхитят Его и сотворят Его царя, отыде паки в гору един. Яко позже бысть, снидоша ученицы Его на море, И влезоша в корабль, и идяху на он пол моря в Капернаум. И тма абие бысть, и не (у) бе пришел к ним Иисус. Море же, ветру велию дыхающе, воздвизашеся. Гребше же яко стадий двадесять пять или тридесять, узреша Иисуса ходяща по морю и близ корабля бывша, и убояшася. Он же глагола им: Аз есмь, не бойтесь. Хотяху убо прияти Его в корабль: и абие корабль бысть на земли, в нюже идяху. Во утрий (же) народ, иже стояше об он пол моря, видев, яко корабля иного не бе ту, токмо един той, в онъже внидоша ученицы Его, и яко не вниде со ученики Своими Иисус в корабль, но едини ученицы Его идоша: И ини приидоша корабли от Тивериады близ места, идеже ядоша хлебы, хвалу воздавше Господеви: Егда же видеша народи, яко Иисуса не бысть ту, ни ученик Его, влезоша сами в корабли, и приидоша в Капернаум, ищуще Иисуса, И обретше Его об он пол моря, реша Ему: Равви, когда zde бысть {когда семо пришел еси}? Отвеща им Иисус и рече: аминь, аминь глаголю вам, ищите Мене, не яко видесте знамение, но яко яли есте хлебы и насытитесь: Делайте же не брашно гиблющее, но брашно пребывающее в живот вечный, еже Сын Человеческий вам даст: Сего бо Отец знамена Бог.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Похвали Иерусалиме Господа, хвали Бога Твоего Сионе.
Аллилуиа, [трижды]

По сему же воображению поем по вся субботы до Вознесения Христова.